

- पहला राष्ट्रीय अंतरिक्ष दिवस रे मौके आज आखा देश मांय कार्यक्रम राख्यी ज्या- प्रदेश मांय विद्यार्थियां ने अंतरिक्ष विज्ञान रा महत्त्व अर भारत री अंतरिक्ष यात्रा रा बारा मांय जाणकारी दीरीजी।
- शिक्षा मंत्रालय सगळा राज्यां अर केंद्र रा राज वाळां प्रदेशां ने स्कूल सुरक्षा दिशा-निर्देश-2021 लागू करण रा हुकम दीना।
- राजस्थान कर्मचारी चयन बोर्ड कानी ऊं ली जावण वाळी समान पात्रता परीक्षा -सीईटी ग्रेजुएशन लेवल मांय अब नेगेटिव मार्किंग नी व्हेला।
- प्रदेश मांय केई ठौड़ां ज़ोरदार मेह बरस्यो- ऊगणी हलकां मांय आवता 5-6 दिन चौमासा री बिरखा व्हेती रेहवण रा आसार।

000

देश आज पहलो राष्ट्रीय अंतरिक्ष दिवस मना रह्यो है। ई मौके नई दिल्ली मांय राख्यी ज्या खास कार्यक्रम रो राष्ट्रपति द्रौपदी मुर्मू उद्घाटन कीनो। वे कह्यो के भारतीय अंतरिक्ष अनुसंधान संगठन -इसरो अंतरिक्ष हलका सागे देश रा सामाजिक अर माली विकास मांय ई अमूल्य योगदान दीनो है।

-----

राष्ट्रपति कह्यो के अंतरिक्ष रा हलका मांय बधवार ऊं इंसान रो बूतो बध्यो है अर ब्रह्मांड रा रहस्य उजागर करण मांय मदद मिली है। ई मौके अंतरिक्ष राज्य मंत्री डॉ. जितेन्द्र सिंह ई मौजूद हा। कार्यक्रम मांय राष्ट्रपति इसरो रा रोबोटिक्स चुनौती अर भारतीय अंतरिक्ष हैकथॉन जीतण वाळां ने ईनाम दे र नवाजा। उपराष्ट्रपति जगदीप धनखड़ अर प्रधानमंत्री नरेन्द्र मोदी पहला राष्ट्रीय अंतरिक्ष दिवस रे मौके जनता ने शुभकामनावां दीनी है। उपराष्ट्रपति सोशल मीडिया रे जरिये कह्यो के ओ दिन खुद रे पाण ऊबा भारत री भावना ऊं अंतरिक्ष हलकां मांय भारत री प्रगति री याद दिरावे है। प्रधानमंत्री मोदी ई सोशल मीडिया पोस्ट रे जरिये कह्यो के देश ने अंतरिक्ष रा हलका मांय हासिल करी ज्यी उपलब्धियां माथे नाज है अर ओ दिन भारत रा अंतरिक्ष वैज्ञानिकां रा योगदान री सराहवणा करण रो दिन है। राज्य मांय ई राष्ट्रीय अंतरिक्ष दिवस रे मौके न्यारा-न्यारा कार्यक्रम राख्यी ज्या। प्रदेश मांय ई पहला भारतीय अंतरिक्ष दिवस रे मौके न्यारा-न्यारा कार्यक्रम राख्यी ज्या। केंद्रीय संस्कृत महाविद्यालय जयपुर मांय निबंध लेखन अर चित्रकला होड़ राख्यी ज्यी। पीएम श्री केंद्रीय विद्यालयां मांय ई प्रश्नोत्तरी अर चित्रकला समेत न्यारी-न्यारी होड़ां राख र अंतरिक्ष दिवस मनायी ज्यो। पाली रा पी.एम. श्री बांगड़ राजकीय उच्च माध्यमिक विद्यालय मांय प्रोजेक्टर रे मार्फत विद्यार्थियों ने चंद्रयान-3 रा लैंडर विक्रम रे लारला साल आज ही रा दिन चांद री सतह माथे उतरण अर रोवर प्रज्ञान रा काम रा बारा मांय जाणकारी दीरीजी अर प्रश्न उत्तर री होड़ जीतण वाळां ने ईनाम दिया ज्या। कोटपूतली-बहरोड़ रा पानादेवी मोरीजावाला राजकीय कन्या महाविद्यालय मांय राख्यी ज्या कार्यक्रम मांय विद्यार्थियां ने खास जाणकारी दीरीजी।

000

वित्त अर कॉर्पोरेट मंत्री निर्मला सीतारमण कह्यो है के कर देवण वाळां री सहूलियत सारू जीएसटी ऊं जुड़्या दपतरां मांय और सुबीता मुहैया कराया जा रह्या है। वे आज उदयपुर मांय नुवो बणायी ज्यो जी.एस.टी. भवन जनता ने सूपण रे मौके बोल रही ही। वित्त मंत्री कह्यो के अहलकारां अर कर देवण वाळां बीचे सकारात्मक माहौल व्हेवण परां समस्यावां आसानी ऊं हल करी जा सके है। वित्त मंत्री कह्यो के सीमेंट, टायर अर खाद उद्योगां सागे खनिज हलका रो जीएसटी मांय मोटो योगदान है अर अब नान्हा उद्योग ई विकसित व्हे रह्या है। वे कह्यो के अब मोबाइल एप आवण ऊं दिसावर मांय माल मांय बेचण अर वठे ऊं खरीदी करण मांय मदद मिली है। नुवो जीएसटी भवन बणावण माथे करीब 32 करोड़ रूप्या रो खर्च आयो है। कार्यक्रम मांय उदयपुर रा सांसद डॉ. मन्नालाल रावत ई सिरकत कीनी। वे उदयपुर मांय महाराणा प्रताप ने केंद्र मांय राख र पर्यटन हब बणावण अर खनिज हलका सारू वित्तमंत्री ऊं मदद देवण री अरज

कीनी। इण ऊं पैली वित्त मंत्री सीथारमण आज संवारे नाथद्वारा मांय श्रीनाथ जी मंदर रा दर्शन कीना।

000

प्रदेश ऊं राज्य सभा री एक रीती सीट सारु व्हे रह्या उप चुनाव मांय भाजपा री ओर ऊं पर्चो दाखिल करण वाळा उम्मीदवार सुनील कोठारी आज नाम पाछो ले लीनो। ध्यानजोग है के राज्यसभा उप चुणाव सारु तीन उम्मीदवार पर्चा दाखिल कीना हा। निर्दलीय उम्मीदवार बबीता वाधवानी रो पर्चो जांच रे दौरान रद्द कर दियो ज्यो हो। ई पाछे अब राज्य सभा उप चुणाव सारु राज्य री एक सीट माथे भारतीय जनता पार्टी रा रवनीत सिंह ही एकला उम्मीदवार बच्या है।

000

शिक्षा मंत्रालय सगळा राज्यां अर केंद्र रा राज वाळा प्रदेशां ने स्कूल सुरक्षा अर सुरक्षा दिशानिर्देश-2021 लागू करण रा हुकम दीना है। अ दिशा-निर्देश शिक्षा मंत्रालय रा स्कूल शिक्षा अर साक्षरता विभाग कानी ऊं बाल यौन अपराध संरक्षण अधिनियम पोक्सो रा दिशा-निर्देशां रे मुजब विकसित करी ज्या हा। आं मांय सरकारी, सरकारी मदद वाळी अर गैर सरकारी स्कूलां मांय पढ़बा वाळा बच्च्यां री हिफाजत रा बारा मांय स्कूल प्रबंधन री जवाबदेही तय करण रा प्रावधान है।

000

राजस्थान कर्मचारी चयन बोर्ड कानी ऊं ली जावण वाळी समान पात्रता परीक्षा-सीईटी ग्रेजुएशन लेवल मांय अब नेगेटिव मार्किंग नी करी जावेला। राजस्थान कर्मचारी चयन बोर्ड रा अध्यक्ष आलोक राज आ जाणकारी दीनी। वे सोशल मीडिया रे ज़रिए बतायो के ई सारु बेगी ही विज्ञप्ति जारी करी जावेला।

000

उत्तर पश्चिम रेलवे री ओर ऊं रेलों ने बिजली ऊं चलावण रो काम तेजी ऊं कर्यो जा रह्यो है। हाल ताई 5 हजार 312 किलोमीटर लम्बी लेणां माथे गाड़ियां बिजली ऊं चलावण ऊं जुड़्या काम पूरा कर लिया ज्या है। उत्तर पश्चिम रेलवे रा मुख्य जनसम्पर्क अधिकारी कैप्टन शशि किरण बतायो के उत्तर पश्चिम रेलवे मांय बड़ी लेणां रा करीब 98 फीसदी हिस्सा माथे 320 गाड़ियां बिजली ऊं चलायी जा रही है। वे बतायो के बिछीवाड़ा-हिम्मतनगर अर थैयात हमीरा – सानू रेलखंड माथे गाड़ियां बिजली ऊं चलावण ऊं जुड़्या काम 30 सितम्बर ताई पूरा कर लिया जावेला। कैप्टन शशि किरण बतायो के दौसा-गंगापुर सिटी रेलखंड माथे गाड़ियां बिजली ऊं चलावण ऊं जुड़्या काम आवता माली साल मांय कर्या जावेला।

000

राज्य मांय आज ई न्यारा-न्यारा हलका मांय मेह बरस्यो। **डूंगरपुर** मांय दोपहरां री बगत हल्की बारिश व्ही। **श्रीगंगानगर** अर सूरतगढ़ मांय संवारे ऊं ई हल्की बरसात रो सिलसिलो चाल रह्यो है। **टोंक** मांय छांटा-छिड़का रा समाचार है। धौलपुर मांय आज दोपहरां पाछे करीब एक घंटा ताई व्ही जोरदार बिरखा ऊं केई हलकां मांय पाणी भर ग्यो। लगातार बिरखा ऊं आ रह्या बत्ता पाणी रे कारण आंगई बांध रा चार दरुजा खोल र बत्तो पाणी निकाळ्यो जा रह्यो है। इण ऊं पार्वती नदी कने रा केई गांवां रो संपर्क टूट ग्यो है। **शाहपुरा** मांय ई दोपहरां पाछे चोखो मेह बरस्यो। **बांसवाड़ा** मांय ई आज चोखो मेह बरस्यो। **जालौर** अर आहोर मांय ई चोखी बिरखा रा समाचार है। **जोधपुर ग्रामीण** जिला रा पीपाड़, भोपालगढ़ अर बावड़ी उपखंड हलकां मांय बिरखा व्ही।

भोपालगढ़ रा नाडसर गांव मांय घणी बिरखा रे कारण गळ रही साखां रा मुआवजा बाबत् किसान गिरदावरी री मांग कीनी है। दूजी कानी **सांचौर** मांय बादळां री आवाजाही बीचे आज उमस रही। ई बीचे **भीलवाड़ा** जिला मांय आसींद उपखंड रा शंभूगढ़ कने बह रही खारी नदी मांय डूब जावण ऊं एक जणा री मौत व्हे ग्यी, जिण री लाश निकाळ लीरीजी है जद के पाणी मांय बह्या एक और जणा री तलाश करी जा रही है। **पाली** मांय ई करीब 1 घंटा ताई जोरदार मेह बरस्यो। जिला रा सोजत कने सुरायता गांव मांय बरसाती नाळा मांय डूब जावण ऊं एक जणा री मौत व्हे ग्यी। जैसलमेर जिला रा रामदेवरा मांय राम सरोवर मांय डूब जावण ऊं एक जातरू री मौत व्हे ग्यी। मौसम केन्द्र जयपुर रा निदेशक राधेश्याम शर्मा बतायो के अरब सागर मांय एक और कम दबाव रा हलका रे कारण राज्य मांय ई बिरखा चालती रेहवण रा आसार है।

000

बीकानेर जिला मांय 222 स्कूलां री चार दीवारी बणावण या टूटी चार दीवारी री मरम्मत सारू मनरेगा रा तैत करीब 20 करोड़ रुपया मंजूर करी ज्या है। जिला कलेक्टर अर मनरेगा री जिला कार्यक्रम समन्वयक नम्रता वृष्णि आ जाणकारी दीनी। वे बतायो के चारदीवारी बणावण ऊं स्कूल परिसर मांय पौधा रोपण ने बधावो मिलेला अर हिफाजत रो इन्तजाम ई व्हेला। जिला कलेक्टर बतायो के मनरेगा रा तहत ही जिला री स्कूलां मांय लड़का अर लड़कियां सारू न्यारा-न्यारा शौचालय बणाया जावेला।

000

राजस्थान रोडवेज री बसां री जांच रे दौरान पलाइंग पार्टियां कानी ऊं करी ज्यी कार्यवाही री वीडियोग्राफी करवाई जावेला। निगम री अध्यक्ष अर प्रबंध निदेशक श्रेया गुहा आ जाणकारी दीनी। वे बतायो के जांच रे दौरान मुसाफिरां रा टिकटां री गिणती करी जावेला।

000

हॉकी रा जादूगर मेजर ध्यानचंद रा जन्म दिन 29 अगस्त रे मौके मनाया जावण वाळा राष्ट्रीय खेल दिवस रा सिलसिला मांय हनुमानगढ़ जिला मांय 26 ऊं 31 अगस्त ताईं खेलां री न्यारी-न्यारी होड़ां राख्यी जावेला। जिला खेल अधिकारी शमशेर सिंह बतायो के 27 अगस्त ने महिला अर पुरुष वर्ग मांय बेडमिंटन अर फुटबॉल रा मुकाबला खेल्या जावेला। 28 अगस्त ने महिला अर पुरुष वर्ग री रस्साकसी होड़ जद के 29 अगस्त ने महिला अर पुरुष वर्ग री हॉकी होड़ रा मुकाबला व्हेला। 30 अगस्त ने महिलावां री चम्मच रेस, म्यूजिकल चेयर, रुमाल झपट्टा होड़ां राख्यी जावेला जदके 31 अगस्त ने 100, 400 अर 1500 मीटर री दौड़ व्हेला।

000